



PATNUBAY SA MISA




7 Hunyo 2015 Dakilang Kapistahan ng Kabanal-banalang Katawan at Dugo ng Panginoon Taong B

ANG EUKARISTIYA: Ang Tatak ng Alyansa Natin sa Diyos

Ang Eukaristiya ay tuwinang tagapag-paalaalang sa pamamagitan ng kanyang pagkamatay sa Krus, pinagtibay ni Hesus ang alyansa ng Ama at ng buong sangkatauhan. Tuwing ipinagdiriwang natin ang Eukaristiya, sinasariwa natin ang alyansang ito sa Diyos bilang mga miyembro ng Kanyang bagong Hinirang na Bayan, ang Simbahan.

Dapat itong maging sapat na dahilan kung bakit di tayo dapat na maging mga saksing walang pakialam habang ipinagdiriwang ang Eukaristiya. Kabilang tayo sa mga “nakipagkasundo” at mga tagapakinabang sa Kasunduan. Ang taos-puso nating paglahok sa pagdiriwang ay patunay sa ating kapasiyahang magpatotoo sa ating pakikipagkasundo sa pamamagitan ng pag-ibig sa Diyos at sa kapwa, gaya ng itinuro at ginawa ni Hesus.

Sa pagdiriwang natin ng Dakilang Kapistahan ng Kabanal-banalang Katawan at Dugo ni Kristo, nawa maipahayag natin ang ating pagmamahal sa Eukaristiya sa buong buhay natin.



PASIMULA



Pambungad

(Ipahayag lamang kung walang awiting nakahanda.)

Pinakamabuting trigo ipinakaing totoo ng Diyos sa mga tao, sarap na kanilang gusto, tamis ng pulot sa bato.

Pagbati

P –Papuri at parangal kay Hesus-kristong Tagapamagitan ng Bagong Kasunduan. Ang kanyang biyaya at kapayapaan ay sumainyong lahat!

B –At sumaiyo rin!

Pagsisisi

P –Bawat Eukaristikong pag-aalay ay pagsariwa sa mapagligtas na Tipang nagbubuklod sa atin sa Diyos. Saglit tayong manahimik at tanungin ang ating mga sarili kung gaano tayo katapat sa ating mga pangakong kaugnay ng

Kasunduan. (Manahimik saglit.)

P –Panginoong Hesus, ikaw ang Tagapamagitan aming ipinagkasundo sa alyansa ng pag-ibig sa Banal na Santatlo. Panginoon, kaawaan mo kami!

B –Panginoon, kaawaan mo kami!

P –Panginoong Hesus, ikaw ang Handog at sa iyong dugo namin pinagtibay ang aming Kasunduan sa Diyos. Kristo, kaawaan mo kami!

B –Kristo, kaawaan mo kami!

P –Panginoon, ikaw ang bukal ng biyayang kailangan namin para maging tapat sa Kasunduan. Panginoon, kaawaan mo kami!

B –Panginoon, kaawaan mo kami!

P –Kaawaan tayo ng makapangyarihang Diyos, patawarin tayo sa ating mga kasalanan, at patnubayan tayo sa buhay na walang hanggan.

B –Amen!

Papuri

B –Papuri sa Diyos sa kaitaan at sa lupa’y kapayapaan sa mga taong kinalulugdan niya. Pinupuri ka namin, dinarangal ka namin, sinasamba ka namin, ipinagbubunyi ka namin, pinasalamatan ka namin dahil sa dakila mong angking kapurihan. Panginoong Diyos, Hari ng langit, Diyos Amang makapangyarihan sa lahat.

Panginoong Hesukristo, Bugtong na Anak, Panginoong Diyos, Kordero ng Diyos, Anak ng Ama. Ikaw na nag-aalis ng mga kasalanan ng sanlibutan, maawa ka sa amin. Ikaw na nag-aalis ng mga kasalanan ng sanlibutan, tanggapin mo ang aming kahilingan. Ikaw na naluluklok sa kanan ng Ama, maawa ka sa amin. Sapagkat ikaw lamang ang banal, ikaw lamang ang Panginoon, ikaw lamang, O Hesukristo, ang Kataas-taasan, kasama ng Espiritu Santo sa kadakilaan ng Diyos Ama. Amen!

Panalangin Pambungad

P– Diyos na totoo at tao namang totoo, Panginoon naming Hesu-kristo, ang Huling Hapunan ay inilagak mo para kami’y magka-salu-salo sa alaala ng iyong pagpa-pakasakit ukol sa mga tao. Ipag-kaloob mo ang aming kahilingang ang iyong Katawan at Dugo ay aming idangal sa pagdiriwang upang ang dulot mong kaligtasan ay lubos naming mapakinabangan kasama ng Espiritu Santo magpa-sawalang hanggan.
B –Amen!

PAGPAPAHAYAG NG SALITA NG DIYOS



Unang Pagbasa *Exo 24:3-8*
Ang Kasunduan sa Sinai ay isang “batayang saglit” sa kaysaysayan ng Hinirang na Bayan. Kaya naman ang pagpapatibay rito ay matapat na nakatala sa Bibliya para alalahanin at angkinin ng lahat ng salinlahi.

L– Pagpapahayag mula sa Aklat ng Exodo

Noong mga araw na iyon, lahat ng iniutos ng Panginoon ay sinabi ni Moises sa mga Israelita. Ang mga ito nama’y parang iisang taong sumagot, “Lahat ng iniutos ng Panginoon ay susundin namin.”

Isinulat ni Moises ang lahat ng utos ng Panginoon. Kinabukasan, maagang-maaga siyang nagtayo ng altar sa paanan ng bundok. Nagtayo rin siya ng labindalawang bato, na kumakatawan sa labindalawang lipi ni Israel. Pagkatapos, inutusan niya ang ilang kabataang lalaki na magdala sa altar ng mga handog na susunugin. Sila rin ang inutusan niyang pumatay ng mga hayop na gagamiting handog sa pakikipag-tipan sa Panginoon.

Ang kalahati ng dugo ng pinatay na hayop ay inilagay niya sa malalaking mangkok at ang kalahati’y ibinuhos niya sa altar. Kinuha niya ang aklat ng tipan at binasa nang malakas. Sabay-sabay namang tumugon ang mga Israelita, “Susundin namin ang lahat ng utos ng Panginoon.” Pagkatapos, kinuha ni Moises ang mga mangkok ng dugo at winisikan ang mga tao. Sinabi niya, “Ang dugong ito ang siyang katibayan ng pakikipagtipang ginawa sa inyo ng Panginoon sa pagbibigay sa inyo ng kautusang ito.”

Ang Salita ng Diyos!
B –Salamat sa Diyos!

Salmong Tugunan *Awit 115*
B –*Sa Panginoong tumubos, kalis ng inumi’y handog!*

R. M. Velez



Sa Pangi-no-ong tumu-bos,



kalis ng i- nu-mi’y han-dog!

* Sa Diyos ko’t Panginoon, ano’ng aking ihahandog sa lahat ng kabutihan na sa akin ay kaloob? Ang handog ko sa dambana, ay inumin na masarap, bilang aking pagkilala sa ginawang paglilig-tas. **B.**

* Masakit sa kalooban ng Poon kung may papanaw, kahit ito ay iisa, labis siyang magdaramdam, katulad ng aking ina, maglilingkod akong lubos yamang ako’y inilig-tas, kinalinga at tinubos. **B.**

* Ako ngayo’y maghahandog ng haing pasasalamat, ang handog kong panalangin’y sa iyo ko ilalagak. Sa templo sa Jerusalem, ay doon ko ibibigay ang anumang pangako kong sa iyo ay binitiwang. **B.**

Ikalawang Pagbasa *Heb 9:11-15*
Si Hesu-kristo ay di lamang siyang Tagapamagitan at Punong Saserdote ng Bagong Kasunduan, kundi siya pa ring Handog mismo. Sa kanyang dugo pinagtibay ang Bagong Kasunduan.

L– Pagpapahayag mula sa Sulat sa mga Hebreo

Mga kapatid, dumating na si Kristo, ang Dakilang Saserdote ng bagong tipan. Siya’y naglilingkod doon sa sambahang lalong dakila at walang katulad, hindi ginawa ng tao, alalaong bago’y wala sa sanlibutang ito. Minsan lamang pumasok si Kristo sa Dakong Kabanal-banalan, at iyo’y sapat na. Hindi dugo ng mga kambing at bisirong baka ang kanyang dalang handog, kundi ang sariling dugo, sa ikapagpapatawad ng mga kasalanan natin.

Ang dugo ng mga kambing at mga toro at ang abo ng dumalagang baka ay iwiniwisik sa mga

taong itinuturing na marumi. Sa gayon, sila’y nagiging malinis ayon sa Kautusan. Ngunit higit na di hamak ang magagawa ng dugo ni Kristo. Sa pamamagitan ng walang hanggang Espiritu ay inialay niya sa Diyos ang kanyang sarili na walang kapintasan. Ang kanyang dugo ang lumilinis sa ating puso’t isip upang talikdan na natin ang mga gawang walang kabulahan at paglingkuran ang Diyos na buhay.

Ang Salita ng Diyos!
B –Salamat sa Diyos!

Awit tungkol sa Mabuting Balita

Pagkaing mula sa langit ngayo’y hain sa daigdig. Handog na kaibig-ibig kaylanma’y di masasaid.

Paghahai’y inilahad nang ialay si Isaac, ang korderong nagliligtas, ang manna ng nagsilikas.

Pastol naming mapagmahal, kami’y iyong kaawaan, gawing dapat makinabang sa pagkaing iyong alay hanggang langit ay makamtan.

Magagawa mo ang lahat upang tanan ay maligtas, akayin mo sa’yong hapag lahat kaming’yong alagad sa buhay mong walang wakas.

Aleluya *Jn 6:51*

B –Aleluya! Aleluya!
Pagkaing dulot ay buhay, si Hesus na Poong mahal. Buhay natin s’ya kailanman.
Aleluya! Aleluya!

Mabuting Balita *Mc 14:12-16.22-26*

Batid ni Hesus na sumapit na ang oras ng pagpatay sa kanya bilang handog ng Bagong Kasunduan. Sa pagpapatunay sa kanyang dakilang pag-ibig, pinangunahan niya ang pag-aalay ng kanyang sarili sa krus sa pamamagitan ng pagtatatag sa Eukaristiya. Sa pamamagitan nito, ang bago’t walang hanggang Kasunduan ay tuwinang sinasariwa sa Simbahan.

P –Ang Mabuting Balita ng Panginoon ayon kay San Marcos
B –Papuri sa iyo, Panginoon!

Unang araw ng Pista ng Tinapay na Walang Lebadura, araw ng pag-

patay ng kordero para sa Paskuwa. Tinanong si Hesus ng kanyang mga alagad, “Saan po ninyo ibig na ipaghanda namin kayo ng Hapunang Pampaskuwa?” Inutusan niya ang dalawa sa kanyang mga alagad, “Pumunta kayo sa bayan. May masasalubong kayong isang lalaki na may dalang isang bangang tubig. Sundan ninyo siya sa bahay na kanyang papasukan at sabihin ninyo sa may-ari, ‘Ipinatatanong po ng Guro kung saang silid siya maaaring kumain ng Hapunang Pampaskuwa, kasalo ng kanyang mga alagad.’ At ituturo niya sa inyo ang isang malaking silid sa itaas na mayroon nang kagamitan. Doon kayo maghanda para sa atin.” Nagtungo sa bayan ang mga alagad at natagpuan nga nila roon ang lahat, gaya ng sinabi niya sa kanila. At inihanda nila ang Hapunang Pampaskuwa.

Samantalang sila’y kumakain, dumampot ng tinapay si Hesus, at matapos magpasalamat sa Diyos ay kanyang pinaghati-hati at ibinigay sa mga alagad. “Kunin ninyo; ito ang aking katawan,” wika niya. Hinawakan niya ang kalis, at matapos magpasalamat ay ibinigay sa kanila; at uminom silang lahat. Sinabi niya, “Ito ang aking dugo ng tipan, ang dugong mabubuhos dahil sa marami. Sinasabi ko sa inyo, hindi na ako inom ng alak na mula sa ubas hanggang sa araw na inumin ko ang bagong alak sa kaharian ng Diyos.”

Umagit sila ng isang imno, at pagkatapos ay nagtungo sa Bundok ng mga Olibo.

Ang Mabuting Balita ng Panginoon!

B – Pinupuri ka namin, Panginoong Hesukristo!

Homiliya

Sumasampalataya

B–Sumasampalataya ako sa Diyos Amang makapangyarihan sa lahat, na may gawa ng langit at lupa.

Sumasampalataya ako kay Hesukristo, iisang Anak ng Diyos, Panginoon nating lahat. Nagkawatang-tao siya lalang ng Espiritu Santo, ipinanganak ni Santa Mariang Birhen. Pinagpakasakit ni Poncio Pilato, ipinako sa krus, namatay, inilibing. Nanaog sa kinaroroonan ng mga yumao. Nang may ikatlong araw nabuhay na mag-uli. Umakyat sa langit.

Naluluklok sa kanan ng Diyos Amang makapangyarihan sa lahat. Doon magmumulang paririto at huhukom sa nangabubuhay at nangamatay na tao.

Sumasampalataya naman ako sa Diyos Espiritu Santo, sa banal na Simbahang Katolika, sa kasamahan ng mga banal, sa kapatawaran ng mga kasalanan, sa pagkabuhay na muli ng nangamatay na tao at sa buhay na walang hanggan. Amen!

Panalangin ng Bayan

P–Nagpapasalamat sa dakilang kaloob ng Eukaristiya at taospusong nananalig sa walang hanggang awa ng ating Banal na Tagapagligtas, tayo’y magdulog sa kanya ng ating mga kahilingan:

B–Panginoong Hesus, sa iyong Katawan at Dugo, pabanalin mo kami!

* Para sa Simbahang Banal na Katawan ni Kristo: Nawa ang Eukaristiya ay siyang maging bukal ng kanyang paglago at pagkakaisa. Manalangin tayo! **B.**

* Para sa Santo Papa, mga Obispo, pari, at laikong ministro ng Eukaristiya: Nawa ang mga buhay nila’y maging kapani-paniwalang saksi sa kabanalan ng Eukaristiya at sa kapangakuang maglingkod. Manalangin tayo! **B.**

* Para sa mga maysakit, api, at mga nangungulila: Makatagpo nawa sila sa Eukaristiya ng tiyak na bukal ng pag-asa at kaligtasan. Manalangin tayo! **B.**

* Para sa kabataan ng ating bayan: Nawa matagpuan nila sa Eukaristiya ang hinahangad nila sa buhay at kanilang espirituwal na pampalusog sa ikatutupad ng kanilang mga pangarap. Manalangin tayo! **B.**

* Para sa ating pamayanan at bawat isa sa atin: Nawa ang Eukaristiya ay maging bukal ng pagkakaisa at inspirasyon natin para sa buhay ng paglilingkod. Manalangin tayo! **B.**

* Tahimik nating ipanalangin ang ating mga pansariling kahilingan. (*Tumigil saglit.*)

Manalangin tayo! **B.**

P–Panginoong Diyos, nawa ang aming paglahok sa Eukaristiya ngayon ay makapagpatibay sa aming kapasiyahang maging tapat sa aming Kasunduan sa Iyo, hanggang sapitin namin ang walang hanggang Piging na Iyong inihanda para sa amin sa pamamagitan ni Kristong aming Panginoon.

B–Amen!



P –Manalangin kayo . . .

B –Tanggapin nawa ng Panginoon itong paghahain sa iyong mga kamay sa kapurihan niya at karangalan, sa ating kapakinabangan at sa buong Sambayanan niyang banal.

Panalangin ukol sa mga Alay

P –Ama naming Lumikha, bigyan mo ngayon ang iyong sambayanan ng mga kaloob na pagkakaisa at kapayapaan na ipinahihiwatig ng mga alay namin sa paghahaing ipinagdiriwang sa pamamagitan ni Hesukristo kasama ng Espiritu Santo magpasawalang hanggan.

B–Amen!

Prepasyo I

P –Ama naming makapangyarihan, tunay ngang marapat na ikaw ay aming pasalamat na pamamagitan ni Hesukristo na aming Panginoon.

Siya ang talagang dakila at lagi mong ikinalulugod na paring naghahain para sa sansinukob nitong pag-aalay na tangi mong ibinukod. Ang ipinagdiriwang sa Huling Hapuna’y paghahain niya para sa tanan upang alalahanin nami’t pagsaluhan. Ang laman niya’y inihain upang lahat ay buhayin. Ang dugo niya’y dumanak nang lahat ay mapatawad.

Kaya kaisa ng mga anghel na nagsisiawit ng papuri sa iyo nang walang humpay sa kalangitan, kami’y nagbubunyi sa iyong kadakilaan:

B –Santo, santo, santo . . .

Pagbubunyi

B–Aming ipinahahayag na namatay ang ‘yong Anak, nabuhay bilang Mesiyas at magbabalik sa wakas para mahayag sa lahat.

PAKIKINABANG



B– Ama namin . . .

P– Hinihiling namin . . .

B– Sapagkat iyo ang kaharian at ang kapangyarihan at ang kapurihan magpakailanman! Amen!

Paanyaya sa Kapayapaan

Paghahati-hati sa Tinapay

B– Kordero ng Diyos . . .

Paanyaya sa Pakikinabang

P– Ito ang Kordero ng Diyos na nag-aalis ng mga kasalanan ng sanlibutan. Mapalad ang mga inaanyayahan sa kanyang piging. **B**– Panginoon, hindi ako karapat-dapat na magpatuloy sa iyo ngunit sa isang salita mo lamang ay gagaling na ako.

Antipona ng Pakikinabang

(Ipahahayag lamang kung walang awiting nakahanda.)

“Ang nagsasalo sa buhay ng sariling aking alay, sa akin ay mananahan, ako ay makakapisan,” ani Hesukristong mahal.

Panalangin Pagkapakinabang

P– Panginoong Hesukristo, hinihiling naming kami’y gawin mong makasalo nang lubusan sa bunga ng banal na pakikinabang sa iyong buhay na idinudulot sa piging ng paghahain ng iyong Katawa’t Dugong banal kasama ng Espiritu Santo magpasawalang hanggan. **B**– Amen!

PAGWAWAKAS



P– Sumainyo ang Panginoon.

B– At sumaiyo rin!

P– Magsiyuko kayo at ipanalangin ang pagpapala ng Diyos. (Manahimik saglit.)

Nawa itulot ng Ama ng awa na kayo’y maging tapat sa Kasunduang pinagtibay ng dugo ni Kristo.

B– Amen!

P– Pagkalooban Niya nawa kayo ng lakas para magbago ang

inyong buhay at ito’y maging palagiang Eukaristiya.

B– Amen!

P– Nawa iligtas Niya kayo sa lahat ng panganib at akayin sa daan ng kapayapaan.

B– Amen!

P– Pagpalain nawa kayo ng maka-

pangyarihang Diyos: Ama, Anak, at Espiritu Santo.

B– Amen!

P– Humayo kayo sa kapayapaan ni Kristo at taglaying lagi ang Eukaristiya sa inyong buhay.

B– Salamat sa Diyos!

ANG EUKARISTIYA: Hapunang Pang-alay ng Bagong Tipan

Ang pagdiriwang ng Eukaristiya ang ubod ng pagsambang Katoliko; at ang Komunyong sakramental ay siyang tampok ng bawat pagdiriwang ng Eukaristiya. Ang taimtim na pagtanggap ng Eukaristiya at ang sagot na “Amen!” bago tanggapin ang banal na tinapay at alak ay matibay na pagpapahayag ng pananampalataya sa tunay na presensiya ni Kristo.

Sa pangungumunyon, pinag-iibayo’t pinagtibay rin natin ang tipang nagbubuklod sa atin sa Diyos bilang mga kasapi ng Kanyang bagong Hinirang na Bayan, ang Simbahan. Sa katunayan, ang Komunyong ay dapat tingnan at tanggapin sa lalong malawak na kontekstong kanyang kinabibilangan – ang walang dugong pag-aalay sa Ama bilang alaala ng pag-aalay ni Hesus sa kanyang sarili bilang ganap na hain para sa ikatutubos ng lahat ng tao (*sangguniin Heb 9:12-14*). Sa gayong pag-aalay pinagtibay ang bago at walang hanggang Tipan sa pagitan ng Diyos at ng sangkatauhan.

Kalahok tayo sa pagsariwa sa ganitong paghahain hindi bilang mga indibiduwal, kundi bilang mga miyembro ng isang “maharlikang pagkapari,” ng isang “banal na bansang” dinalisay ng dugo ng Kordero (*sangguniin 1 Ped 2:9 at Pah 5:9*. . .) at hinubog sa isang Katawan ng isang Espiritu. Tuwing iniaalay natin at tinatanggap ang Katawan at Dugo ni Kristo, ginagampanan natin ang ating maharlikang pagkapari, ipinahahayag natin ang ating pagiging kabahagi ng Katawan ng Panginoon, at sinasariwa natin ang Tipang nagbubuklod sa atin sa Diyos at sa ating kapwa.

Ngunit upang makalahok sa Eukaristiya nang karapat-dapat at mabisa, dapat tayong dumulog nang may malinis na kalooban, nakababtid sa kabanalan ng kaloob na ating tinatanggap, at nakalaang gawin nating tunay na Eukaristiya ang ating buhay.

Alalahanin natin ang babala ni Pablong bago mangumunyon, “bawat isa’y dapat magsuri sa sarili . . . pagkat kung hindi niya pina-hahalagahan ang katawan ng Panginoon kapag kumakain siya ng tinapay at umiinom sa saro, siya’y kumakain at umiinom ng hatol sa kanyang sarili” (*sangguniin 1 Cor 11:28*).



**WORD & LIFE
PUBLICATIONS**

Don Bosco Compound, A. Arnaiz Ave. cor. Chino Roces Ave., Makati, Metro Manila

Postal Address: P.O. Box 1820, MCPO, 1258 Makati, Metro Manila, Philippines

Tel. Nos. 894-5401; 894-5402; 892-2169 • Telefax: 894-5241 • Website: www.wordandlife.org

• E-mail: marketing@wordandlife.org, wordandlifepublications@gmail.com • FB: Word & Life Publications

• Editorial Team: Fr. S. Putzu, C. Valmonte, Sr. F. Santos, SMI, G. Ramos, R. Molomog, D. Daguio, V. David • Illustrations: A. Sarmiento, B. Cleofe • Circulation: F. Edjan